


TEZAU LITURGIC

20 DECEMBRIE

**ACATISTUL
SF.PREOT
IOAN SERGHIEV
DE LA
KRONSTADT-
ST.PETERSBURG
IV**



MOSCOVA, 2000



Акафист святому праведному Иоанну Кронштадтскому

Кондак 1 , глас 8

Избранному во иереях, пастырю великому, молитвеннику неусыпному, земли Русския светильнику неугасимому, пресвитеру Божию Иоанну радостно взываем:

Радуйся, Иоанне, Церкви Российския пастырю предивный.

Икос 1

Ангела-хранителя твоего в светлости неизреченной, отроча младо быв, яве узрел еси, досточудне отче Иоанне. И тако избранника Божия тя ведуще, сице глаголем:

Радуйся, родителей благочестивых утешение.

Радуйся, ангела-хранителя увеселение.

Радуйся, молитве в доме отчем навывкувый.

Радуйся, послушание с детства возлюбивый.

Радуйся, яко в бедности учение проходил еси.

Радуйся, яко и тогда попечение о сродниках имел еси.

Радуйся, всем сердцем Бога возлюбивый.

Радуйся, праведным житием Ему угодивый.
Радуйся, Иоанне, Церкви Российския пастырю
предивный.

Кондак 2

Видевше тебя, предивне отче Иоанне, от
возраста юна в благодати Божией пребывающа
и ею в добродетельном житии наставляема,
имеем тя во образ и подражание и умиленно
поем Христу Богу: Аллилуиа.

Икос 2

Разум твой от лет отроческих в чтение
Священнаго Писания углубил еси, Иоанне
богомудре. Темже взываем ти, умоли
милостиваго Бога, да сподобит быти
причастниками благодатного труда сего и нас,
восписующих тебе таковая:

Радуйся, благодати Божией носителю.
Радуйся, Евангельской Истины служителю.
Радуйся, благочестия твердый насадителю.
Радуйся, Царствия Божия возвестителю.
Радуйся, яко прелести мира скоро распознал
еси.
Радуйся, яко от юности Богу себя предал еси.
Радуйся, предстоящих престолу Божию
сотаинниче.

Радуйся, Православия верный поборниче.
Радуйся, Иоанне, Церкви Российския пастырю
предивный.

Кондак 3

Силою Божественныя благодати яко
свещильник многосветлый просиял еси, отче
праведный Иоанне. Просветив же люди,
во тьме греховней сидящая, наставляя их пети
Богу: Аллилуиа.

Икос 3

Имея о тебе особое промышление, призвал тя
Господь, Иоанне многотрудне, в священном
сане на подвиг любви деятельной. Пастырское
служение совершая, не ведая ни сна, ни покоя,
ты потекл еси к бедным людям града
Кронштадта. Мы же, ведуще сие, вопием ти
сице:

Радуйся, Православныя Церкви похвало и
радование.

Радуйся, страны Российския славо и украшение.

Радуйся, пути спасительного истинный учителю.

Радуйся, труда народного мудрый устроителю.

Радуйся, яко множество людей к труду
приобщил еси.

Радуйся, яко дома трудолюбия основал еси.

Радуйся, пресвитером Кронштадтским
нареченный.

Радуйся, Всероссийским пастырем почитаемый.
Радуйся, Иоанне, Церкви Российския пастырю
предивный.

Кондак 4

Бурю внутри имеша помышлений
сумнительных братия - сопастырие, видя
дерзновенный образ пастырского служения
твоего, отче Иоанне. Ты же, упование на Бога
возложив, с чистым сердцем воспевал
Ему: Аллилуиа.

Икос 4

Слышав о тебе, Иоанне блаженне, яко ты еси
пастырь добрый, страждущих и обремененных
утешитель и молитвенник слезный, от всех
конец земли потекоша к тебе людие Божии. Мы
же, ведая человеколюбие и милосердие твое,
благодарне зовем таковая:

Радуйся, любовь к Богу и людям преизобильная.
Радуйся, надеждо в бедах сущих несумненная.
Радуйся, о падших пред Богом заступниче.
Радуйся, дерзновенный о людех молитвенниче.
Радуйся, яко сирых и вдовиц защищал еси.
Радуйся, яко во узах пребывающих утешал еси.

Радуйся, недужных телом и душою врачевателю.
Радуйся, смятенных сердец умирителю.
Радуйся, Иоанне, Церкви Российския пастырю
предивный.

Кондак 5

Яко боготечная пресветлая звезда просиял еси
в Церкви Православней, чудотворче предивне
Иоанне, образ являя пастыря и молитвенника
усерднаго за народ и страну нашу. Радуюсь
сему, людие православныя немолчно воспевают
Богу: Аллилуиа.

Икос 5

Видя множество людей российских, утешения
чающих, Иоанне милосердне, ты обходил грады
и веси Отечества нашего и яко апостол
просвещал народ светом веры Христовой. Мы
же, велия труды твоя почитающе, благодарне
возносим похвалы сия:

Радуйся, Державу Российскую крепко
возлюбивый.

Радуйся, непрестанно молитву о благе ея
возносивый.

Радуйся, Севера Русского защита и ограждение.
Радуйся, края Поморского надежду и
укрепление.

Радуйся, Архангельския земли чудное украшение.

Радуйся, веси Сурския велие прославление.

Радуйся, Земли Русския пресветлое озарение.

Радуйся, Православной веры в ней утверждение.

Радуйся, Иоанне, Церкви Российския пастырю предивный.

Кондак 6

Проповедницы чудных деяний твоих явишася множество людей, ведущих силу молитвы твоея, пастырю Христов Иоанне. Слышав сие, не токмо православныя, но и иновернии уповали на помощь твою. По молитвам же твоим просимое получая, воспеваша Богу: Аллилуиа.

Икос 6

Возсиял еси житием твоим в Церкви Православной паче сияния северного, Иоанне благосердне. Радуюсь сему, молим Господа сил, дабы нам подражать житию твоему, со умилением взывая сице:

Радуйся, многосветлый Церкви светильниче.

Радуйся, жизни во Христе проповедниче.

Радуйся, людских скорбей утешителю.

Радуйся, милостыни щедрый подателю.

Радуйся, яко душам заблудшим помогал еси.
Радуйся, яко любовь свою на всех простира
еси.

Радуйся, спасения нашего наставниче.

Радуйся, любви неиссякаемый источниче.

Радуйся, Иоанне, Церкви Российския пастырю
предивный.

Кондак 7

Хотя Всеблагий Господь спасти народ наш от
испытаний и бед, грядущих на него по
праведному суду Божию, исполни ты, отче
Иоанне, духа пророчества и премудрости, да
словом твоим вразумленный, непрестанно поет
Богу: Аллилуиа.

Икос 7

Нового избранника Божия ты введуще, Иоанне
преславне, каждодневно Жертву Бескровную о
всех и за вся приносяща, боголюбивии людие с
верою и надеждою к тебе притекаху, с
любовию воспевахе тебе таковая:

Радуйся, образ великого пастыря миру явивый.

Радуйся, народу Божию неустанно служивый.

Радуйся, Царя Небеснаго рабе верный.

Радуйся, служителю Того усердный.

Радуйся, яко народному горю сострадал еси.

Радуйся, яко спасения ищущим помогал еси.
Радуйся, обуреваемых страстями тихое пристанище.

Радуйся, бедных и странников надежное прибежище.

Радуйся, Иоанне, Церкви Российския пастырю предивный.

Кондак 8

Странное и дивное чудо явлено бысть тебе, пастырю Всероссийский Иоанне. Милейшая чада Отца Небесного нарекла еси в видении Пречистая Матерь Божия ты и вся люди, последующия тебе. Мы же, ведая о сем, славим Бога, поя Ему: Аллилуиа.

Икос 8

Весь преисполнен любви к людям, Кровию Сына Божия искупленным, Иоанне достохвальне, ты пошел еси к неимущим благочестия, трезвения и страха Божия. Сих же кротостию и любовью покорив Христу, научи и нас усердно взывать тебе сие:

Радуйся, благочестия ревностный насадителю.

Радуйся, сырых и убогих милостивый покровителю.

Радуйся, мудрый делателю винограда Христова.

Радуйся, лучу пресветлый любви Божия.
Радуйся, яко окамененныя сердца пробуждал
еси.
Радуйся, яко в пьянстве пребывающих
вразумлял еси.
Радуйся, супружеской неверности обличителю.
Радуйся, о покаянии грешников рачителю.
Радуйся, Иоанне, Церкви Российския пастырю
предивный.

Кондак 9

Всем, спасения чающим, воздвиги ты Господь
на радость, богоносне отче Иоанне. Людие же
российстии во множестве к тебе притекаху и
яко другу Христову исповедаху грехи своя.
Прощение же от Бога получивше, выну взываху
Ему: Аллилуиа.

Икос 9

Витии велегласныя не возмогут воспети по
достоянию пастырского подвига твоего, Иоанне
приснопамятне: в браке быв, яко безбрачен
был еси, Святых Тайн Христовых на всяк день
причащался еси и всем был вся, да всяческая
Христу приобрящеши. Мы же, ведуще сие,
воспеваем тебе таковая:

Радуйся, Хлебом Жизни насыщенный.
Радуйся, Питием Бессмертным напоенный.
Радуйся, путь девства и чистоты избравый.
Радуйся, многия скорби претерпевый.
Радуйся, яко милосердие Божие проповедал еси.
Радуйся, яко сораспяться Христу возжелал еси.
Радуйся, проповедниче дерзновенный.
Радуйся, наставниче пастырей богомудрый.
Радуйся, Иоанне, Церкви Российския пастырю предивный.

Кондак 10

Спасти хотя немощныя в вере от ересей и раскола, обличал еси козни врагов веры Православныя, пастырю доблестный Иоанне. Душу же свою за спасение народа Божия положив, Царствия Небесного достиг еси, идеже с лики святых непрестанно Бога славиши и поеши Ему: Аллилуиа.

Икос 10

Стена крепка был еси страждущим людям, от всех конец Отечества нашего к тебе приходящим, Иоанне праведный. Буди же ограждение неодолимое от бед и напастей всем, взывающим ти сице:

Радуйся, душевредных расколов искоренителю.
Радуйся, с силами ада доблестный воителю.
Радуйся, в брани духовной нам укрепление.
Радуйся, от козней вражиих ограждение.
Радуйся, яко неведующия Бога просвещал еси.
Радуйся, яко о спасении людей радел еси.
Радуйся, воине Христов добропобедный.
Радуйся, молитвенниче о нас преизрядный.
Радуйся, Иоанне, Церкви Российския пастырю
предивный.

Кондак 11

Пение всеумиленное прими от нас, дивный
угодниче Божий Иоанне. И пребывая ныне на
небеси, вознеси молитвы твоя Царю всех веков,
дабы в Отечестве нашем из рода в род присно
воспевалась победная песнь: Аллилуиа.

Икос 11

Светозарную свещу, путь спасения заблудшим
указующую, ведаем тя, Иоанне преблаженне.
Воззри на нас, чад твоих, облегчи наша скорби
и наша недуги исцели, да благодарно тебе
вопием:

Радуйся, светом благодати Божией
преосененный
Радуйся, столпе Православия непоколебимый.

Радуйся, скорбей и печалей отгнание.
Радуйся, плачущих скорое утешение.
Радуйся, яко тяжкия болезни врачевал еси.
Радуйся, яко немощи наша исцелял еси.
Радуйся, кающихся неложное упование.
Радуйся, спасающихся непрестанное
радование.
Радуйся, Иоанне, Церкви Российския пастырю
предивный.

Кондак 12

Благодать, данную тебе от Бога ведуще,
целителю и чудотворче Иоанне, молим тя
прилежно: изобильных даров Духа Святаго да и
мы причастницы будем и во умилении сердец
наших благодарно воспоем Богу: Аллилуиа.

Икос 12

Поюще твое достохвальное житие на земли и
славу, юже стяжал еси на небеси, ублажаем тя,
святый праведный отче наш Иоанне,
множество храмов и обителей православных
основателя, и от умиленных сердец
возглашаем ти сицевая:

Радуйся, храмов Божиих усердный строителю.
Радуйся, обителей иноческих устроителю.
Радуйся, ангельского жития в них ревнителю.

Радуйся, изнемогающих в подвигах утешителю.
Радуйся, яко ревнующим о спасении помогал еси.

Радуйся, яко к молитве и терпению призывал еси.

Радуйся, до конца Господу послуживый.

Радуйся, Царствие Божие наследовавый.

Радуйся, Иоанне, Церкви Российския пастырю предивный.

Кондак 13

О святой праведный отче Иоанне, страны Российския чудное и светлое похвало, пресвитере Кронштадтский, пастырю Всероссийский, всемирный светильниче и великий угодниче Христов. Приими от нас, недостойных, малое сие молебное пение и благоприятными твоими к Богу молитвами избави от бед и скорбей, да сподобимся с тобою в Царствии Небеснем вечно воспевати Богу: Аллилуиа.

Сей кондак читается три раза, затем икос 1 и кондак 1



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО